



## 買賣算分

人講啊，做生理人係「蛤蟆吊算盤，一等會算！」佢對吾姆个肚屎裡肚起勢，就看等吾姆做生理、學等吾姆掌店，吾姆有幾會算仔，佢盡知！佢總係講：「做生理人，就係為著該兩銚錢，係講任做都賺無錢，該毋當交腳閒奈較贏！」

故所，係講有新產品愛賣，吾姆定著會自家先試過，看用得無、抑係好食無？還過佢會先胚想，這莊下賣得行無？成時想了想，還係有賣毋行个東西，佢就會喊中盤煞煞收轉去，同佢講：「趕還萋萋、退還你，看哪位走較遽、打分佢，莫了著若本錢。」

有時節，新糖仔實在錫人，人客還言買著半粒，就分佢上一粒、下一粒拈忒會五股一，吾姆就會曉佢：「毋好過拈哩啲，過拈，利存就分你食過迄地。」佢心肝肚不服：「去同人買，乜愛使著若錢啊！」黏時，吾姆个目神仔就會應佢：「買還買，賣還賣！這猴嫻，你想仰仔？」跔等，吾个三隻手指，原本係暢若若仔集合愛拈糖仔，就分人睇到毋甘願个散開。

吾姆有幾戔真仔？佢來講分你聽！見擺，吾姐公來買東西，都聘得無較便宜，還過零星錢也有撿，吾姆還講「買賣算分」啊！吾姆總係恁樣問：「阿爸，今晡日係欠麼个呢？」吾姐公係講三、五項，總有一項半項吾姆會應：「該項，您還言有用著乜，吾店項毋罇地，等下某某人(中盤)就來哩，佢會同您留等。」其他个照算，一角乜無減。

少忒該項，吾姆會等人客較少个時節喊佢送上去。成時，吾姐公正行啊轉，佢後腳就跔等入地。「阿公，這項您毋記得拿著哩！」該項，一般都係吾姐公自家愛用、愛食个東西。麼个「毋記得拿著」，當然乜係吾姆教个，錢，當然就毋使收啊！就講「買還買，送還送」！

係恁堵好，弓蕉賣到起點地、言過熟，阿喜伯婆又堵好行出來街項。吾姆就會鬥當佢：「阿喜伯姆，這托弓蕉同佢搵銷哪，總下去，兩個銀就好。」佢心肝肚想，割來兩十零銀个東西，伸著兩個銀還使賣？等到有閒，吾姆會講分佢聽：「這弓蕉錢，您早就賺起來地，阿喜伯婆難得出來街項，佢就淨盼得買分厥孫仔食定定，哪盼得買分自家？這係佢中意食个弓蕉、又堵好同佢搵銷，盡好哦！」佢還係嘴翹鼻翹、用白白个目珠看吾姆「該兩個銀，不惜莫收！送阿喜伯婆食就好咧！恁齧做麼个？」

吾姆會開容笑面同佢講：「『買還買，送還送』，阿喜伯婆係同佢交官哦，您愛承蒙佢；佢仰使分你送，害佢擔人擔情！」「買賣算分」啊，吾姆做生理，正經分到當清楚、乜當會算！

作者：彭瑞珠

### ☆詞彙學習☆

【兩銚錢】liong` xien` qien`：兩毛錢。

【交腳】kau` giog`：翹腳。

【過迄】go fang：超過。

【戔真】den` ziin`：錙銖必較。

【聘得】pin` ded`：絕對、一定。

【起點地】hi` diam` e`：長出斑點了。

【搵銷】ten seu`：幫忙消耗。

【嘴翹鼻翹】zoi ngieu pi ngieu：嘟嘴張鼻，不以為然的樣子。

【不惜】bud` xid`：倒不如。